

- राज्य मांय केई ठोड़ां व्ही ज़ोरदार बारिश ऊं जिन्दगी माथे असर पड़्यो-ऊगणी हलका मांय नुकसाण रा समाचार।
- मुख्यमंत्री भजनलाल शर्मा जैसलमेर अर बीकानेर मांय सोलर पार्क बणावण सारू जमीं आवंटित करण रा प्रस्ताव मंजूर कीना।
- प्रधानमंत्री 130वां संविधान संशोधन बिल री हिमायत कीनी-कह्यो-सरकार भ्रष्टाचार रे खिलाफ करडो कानून लायी।
- प्रदेश मांय बिजली रा नुवा कनेक्शन परां स्मार्ट मीटर लगावण री ज़रूरत खत्म करीजी।

000

राज्य रा केई ज़िलां मांय व्ही ज़बरदस्त बरसात ऊं जिन्दगी माथे घणो असर पड़्यो है। ई सागे ई प्रदेश रा ऊगणी हलकां मांय व्ही जबरदस्त बारिश ऊं घणो नुकसाण व्ह्यो है। टोंक, सवाईमाधोपुर, बारां अर कोटा मांय व्ही भारी बारिश पाछे हालात मुश्किल व्हे गया है। मौसम विभाग रे मुजब लारला चौबीस घंटा मांय सब ऊं बत्तो 25 सेंटीमीटर पाणी सवाईमाधोपुर मांय बरस्यो। ई कारण दुकानां अर घरां मांय पाणी भर ग्यो अर केई कच्चा मकान ढस गया। म्हाणा खबरनवीस बतायो के चौथ का बरवाड़ा, मलारना डूंगर अर खंडार समेत केई ठोड़ां पाणी भर जावण ऊं घणी परेशानी व्हे रही है।

000

बूंदी ज़िला रा पाटन मांय 21 सेंटीमीटर बारिश व्ही। भीलवाड़ा ज़िला रा बिजौलियां अर जहाजपुर मांय ई ज़ोरदार मेह बरस्यो। ज़िला मांय ऐरू नदी उफाण रही है। बारां जिला रा किशनगंज, मांगरोल अर अंता मांय मूसलाधार बारिश ऊं जिन्दगी माथे घणो असर पड़्यो है। कोटा मांय लारला बारह घंटा मांय दस इंच ऊं बत्तो पाणी बरस्यो। इण ऊं केई हलकां मांय पाणी भर ग्यो अर सड़कां माथे गाड़ियां फंस गयीं।

000

बांसवाड़ा, चित्तौड़गढ़, प्रतापगढ़, डूंगरपुर, उदयपुर, पाली, जालौर अर जोधपुर समेत केई ज़िलां मांय 8 ऊं 10 सेंटीमीटर ताई मेह बरस्यो। नागौर, बाड़मेर, जैसलमेर, बीकानेर, दौसा, झालावाड़ अर अजमेर ज़िलां मांय ई केई ठोड़ां चोखी बारिश रा समाचार है। राजधानी जयपुर मांय ई आज व्ही तेज बरसात ऊं केई ठोड़ां सड़कां माथे जाम लाग ग्यो। सिरौही ज़िला मांय तीन दिन ऊं रुक-रुक र व्हे रही बिरखा ऊं नदी-नाळां मांय पाणी रो लेवल बध रह्यो है। मौसम विभाग आज कोटा, उदयपुर अर जोधपुर संभाग मांय कठे-कठे भारी ऊं घणी भारी बारिश रा आसार जताया है। अजमेर, भरतपुर अर जयपुर संभाग रा कुछ हलकां मांय ई भारी बारिश री संभावना है। विभाग रे मुजब प्रदेश मांय आवता सप्ताह ताई बारिश रो सिलसिलो चालतो रेहवण रा आसार है। ई बीचे जबरदस्त बारिश रे कारण उपजा हालात ने ध्यान राखता थकां कोटा विश्वविद्यालय काल व्हेवण वाळी सगळी परीक्षावां टाळ दीरीजी है। सवाईमाधोपुर मांय ई भारी बारिश रे कारण ज़िला कलेक्टर काल स्कूलां मांय छुट्टी रो ऐलाण कर दीनो है।

000

मुख्यमंत्री भजनलाल शर्मा जैसलमेर अर बीकानेर मांय सोलर पार्क बणावण सारू जमीं आवंटित करण रा प्रस्तावां ने मंजूरी दे दीनी है। जैसलमेर रा रामगढ़ मांय 5 हजार मेगावॉट बूता रा सोलर पार्क सारू 6 हजार 771 हैक्टेयर अर 27 सौ मेगावॉटर सोलर पार्क सारू 5 हजार हैक्टेयर ऊं बत्ती जमीं आवंटित करण री मंजूरी दीरीजी है। फतेहगढ़ तहसील मांय ई सोलर पार्क सारू जमीं आवंटन री मंजूरी दे दीरीजी है। बीकानेर जिला रा दीनसर, बराला, बिकोलाई अर करणीसर भाटियान गांवां मांय जमीं आवंटन री मंजूरी दीरीजी है। धौलपुर जिला री बाड़ी तहसील रा विजौली गांव मांय औद्योगिक इकाइयां सारू जमीं आवंटन री मंजूरी दीरीजी है। श्री शर्मा आज जयपुर मांय वां रा दफ्तर मांय कृषि विभाग रा अहलकारां सागे ई मीटिंग कीनी। वे प्रदेश मांय व्हे रही चोखी बिरखा ने ध्यान राखता थकां किसानां सारू जरूरी तादाद मांय खाद-बीज री उपलब्धता तैय करण रा हुकम दीना।

000

मुख्यमंत्री भजन लाल शर्मा चार्टर्ड अकाउंटेंट्स ने बदलावां अर तकनीकी नवाचारां ने अपना र लोगां रा भरोसा माथे खरा उतरण बाबत कह्यो है। वे आज जयपुर मांय इंस्टीट्यूट ऑफ चार्टर्ड अकाउंटेंट्स री ओर ऊं राखी ज्यी एआई इनोवेशन समिट मांय बोल रह्या हा।

000

प्रदेश मांय 10 दिसम्बर ने पहलो प्रवासी राजस्थानी दिवस मणायो जावेला। राज्य सरकार ई मौके 9 अर 10 दिसम्बर ने 'राइजिंग राजस्थान' पार्टनरशिप कॉन्क्लेव-2025 ई राखेला। ई रा तैत राज्य री माली व्यवस्था रा खास हलकां अर निवेश रा उभरता हलकां, नौजवानां, महिलावां, स्वास्थ्य, ऊर्जा अर उद्योग रा बारा मांय खास सत्र राख्या जावेला।

ई सागे ई दिल्ली, हैदराबाद, सूरत अर कोलकाता सागे संयुक्त अरब अमीरात मांय ई निवेशक रोड शो राख्या जावेला। कॉन्क्लेव ऊं पैली खनन, पेट्रोलियम अर पर्यटन हलका रा बारा मांय ई पूर्व शिखर सम्मेलन राख्या जावेला। ध्यानजोग है के मुख्यमंत्री भजनलाल शर्मा लारला साल राखी ज्यी राइजिंग राजस्थान ग्लोबल इन्वेस्टमेंट समिट मांय प्रवासी राजस्थानी दिवस मणावण रो ऐलाण कीनो हो।

000

प्रधानमंत्री नरेन्द्र मोदी राष्ट्रीय जनता दल अर कांग्रेस माथे वोट बैंक अर तुष्टिकरण री सियासत सारू घुसपैठियां री हिमायत रो आरोप लगायो है। वे आज बिहार मांय बोधगया रा मगध विश्वविद्यालय मैदान मांय राखी ज्यी जनसभा मांय बोल रह्या हा। श्री मोदी कह्यो के सरकार एक जनसांख्यिकी मिशन सुरू करेला, जिण ऊं घुसपैठियां ने बाहर निकाळबा मांय मदद मिलेला। प्रधानमंत्री भ्रष्टाचार रोधी बिल री खिलाफत करण सारू विपक्ष री पार्टियां री आलोचना कीनी। ई बिल मांय भ्रष्टाचार रा आरोप मांय दोषी अर 30 दिन ऊं बत्ता बगत ताई जेल मांय रेहवण वाळा प्रधानमंत्री, मुख्यमंत्री अर दूजा मंत्रियां ने हटावण रो प्रावधान है।

000

प्रधानमंत्री गया मांय करीब 13 हजार करोड़ रुपया रा खर्च वाळी विकास री केई परियोजनावां रा काम री नींव रखी अर पूरा व्ह्या कामां रो उद्घाटन कीनो। ई पाछे प्रधानमंत्री कोलकाता मांय जनसभा ने संबोधित कीनी। वे कह्यो के भारत दुनिया री तीजी मोटी माली व्यवस्था बणबा ओड़ी बढ़ रह्यो है।

000

प्रदेश मांय नुवा बिजली कनेक्शन देवण रे दौरान स्मार्ट मीटर लगावण री जरूरत खत्म कर दीरीजी है। ज्यां हलकां मांय स्मार्ट मीटर लगावण रो काम सरू नी व्ह्यो है, वठे खराब अर बढ्योड़ा मीटर री ठोड़ सामान्य मीटर लगाया जा सकेला। बिजली वितरण कंपनियां री ओर ऊं ई बारा मांय नुवी गाइडलाइन जारी करी ज्यी है।

000

राज्य सरकार मोबाइल वेटेनरी यूनिट अर कॉल सेंटर सेवावां रे घणी जरूरी व्हेवण रो ऐलाण कर दीनो है। ढांढां राखण वाळां ने कोई परेशानी नी व्हेवण देवण सारू ओ फँसलो करी ज्यो है। घणी जरूरी सेवा ऐलाण करी ज्यां पाछे मोबाइल वेटेनरी यूनिट अर कॉल सेंटर रा कर्मचारी आवता छह महीना ताई हड़ताल नी कर सकेला।

000

एनिमिया मुक्त डूंगरपुर अभियान रा तैत लगायी ज्या शिविरां मांय खून री कमी रो सामो करण वाळी पिछाणी ज्यी 20 हजार मांय ऊं 19 हजार 600 महिलावां मांय अब खून री कमी नी रही है। जिला कलेक्टर अंकित कुमार सिंह आ जाणकारी दीनी। वे बतायो के एनिमिया रो सामो करण सारू ई साल 1 जनवरी ऊं झोंथरी ब्लॉक ऊं ओ अभियान सरू करी ज्यो। वे बतायो के ई रा तैत हाल ताई 476 शिविर लगाया जा चुक्या है।

000

लोकसभा अध्यक्ष ओम बिरला वां रा संसदीय हलका कोटा-बूंदी मांय मोटी तादाद मांय पूग्या लोगां सागे मुलाकात कीनी। अ लोग कोटा-बूंदी ग्रीनफील्ड एयरपोर्ट री मंजूरी सारू श्री बिरला रो आभार जतायो। ध्यानजोग है के ई परियोजना सारू केन्द्रीय मंत्रिमंडल 1 हजार 507 करोड़ रुपया मंजूर कीना है।

000